



27. december 2018

Inatsisartut Suleriaasianni § 37 imm. 1 naapertorlugu Naalakkersuisunut apequt imaattoq matumuuna saqqummiuppara.

Naalakkersuisunut apequt:

1. §37 naapertorlugu apequtinnut 321-2018-mut akissumminni Naalakkersuisut allapput, ukiap ingerlanerani Naalakkersuisoqarfik piniartunit, inuinnarnit, piniarnermut nakkutilliisunit, politiinit kommuniniillu piniakkanik killilersukkanik piniarneq kiisalu piniakkat killilersukkat atornerarneri pillugit piniarnermut aallaaniarnermullu inatsimmik unioqqutitsinernik tunngasunik takunnissimanernik pasilliutinillu tigusaqarsimasoq.

Ulloq 14. november 2018 apeqquteqaat aallaavigalugu Inatsisartuni oqallineq pivoq, sammeneqarluni Jens Napaattuup (PN) oqallisissiaa piniakkat killilersukkat Avanersuaq, Ittoqqortoormiut Tasiilarlu eqqarsaatigalugit killilersorneqarunnaarnissaat anguniarlugu oqallisissiaq.

Piniakkanik killilersukkanik piniarneq kiisalu piniakkat killilersukkat atornerarnerat pillugu piniarnermut aallaaniarnermullu inatsimmik unioqqutitsinernik tunngasunik pasilliinerit takkussimasut pillugit Naalakkersuisut aamma Piniarnermut, Aalisarnermut Nunalerinermullu Naalakkersuisoq ulloq 14. November 2018 ilisimareersimavaat?

2. Apequt 1 angerneqarpat: ulloq 14. November 2018 inersuarmi oqallinnerup qiterisaa innersuussutigalugu: Piniakkanik killilersukkanik piniarneq kiisalu piniakkat killilersukkat atornerarnerat pillugu piniarnermut aallaaniarnermullu inatsimmik unioqqutitsinernik tunngasunik nalunaaquteqartoqarsimanera sumik patsiseqartumik Naalakkersuisut kiisalu Piniarnermut, Aalisarnermut Nunalerinermullu Naalakkersuisup Inatsisartunut ilisimatitsissutigingilaat?
3. Ulloq 6. December 2018 qilalukkanik qernertanik politikikkut aalajangikkamik Naalakkersuisut pisasseqqipput, tassalu Qimusseriarsuarmut kiisalu Qeqertarsuup Tunuanut.

Ulloq 6. December 2018 aalajangiinerminni Naalakkersuisut ilisimasimavaat piniakkanik killilersukkanik piniarneq kiisalu piniakkat killilersukkat atornerarnerat pillugu piniarnermut aallaaniarnermullu inatsimmik unioqqutitsinernik tunngasunik nalunaaquteqartoqarsimanera, Upernaviup eqqaa Qeqertarsuullu Tunua aamma tassani ilaallutik?

4. Apequt 3 angerneqarpat: Pisasseqqittoqarnissaanik politikikkut aalajangikkamut ullormi 6. December 2018 aalajangernermi suna tunngaviuva, tassani ilisimareerneqarsimappat piniakkanik killilersukkanik piniarneq kiisalu piniakkat killilersukkat atornerarnerat pillugu piniarnermut aallaaniarnermullu inatsimmik unioqqutitsinernik tunngasunik nalunaaquteqartoqarsimanera, tassani ilaallutik Upernaviup eqqaa aamma Qeqertarsuup Tunua?

5. Apeqquut 3 angerneqarpat: Immikkut pisasseeqqittoqarnissaanik Naalakkersuisut aalajangernerminni qulakkeersimavaat immikkut pisassiissutaasut piniartunut maleruagassanik unioqqutitsinngitsunut tutsinneqarnissaat?
6. Piniarnermut aallaaniarnermullu inatsimmik unioqqutitsisoqarsimaneranut tunngasut pillugit politikikkut aalajangikkamik pisasseeqqinnissaq sioqqullugu Piniarnermut, Aalisarnermut Nunalerinerimullu Ataatsimiititaliaq Naalakkersuisumit ilisimatinneqarpa?
7. Apeqquut 6 angerneqarpat: Ataatsimiititaliaq ilisimatitsineq qanga piva?
8. §37 naapertorlugu apeqquuteqaammut 321-2018-mut akissutitigut ersertoq piniarnermut aallaaniarnermullu inatsimmik unioqqutitsisimanermit tunngasut qangarpiaq Naalakkersuisut ilisimalerpaat?
9. Piniarnermut aallaaniarnermullu inatsimmik unioqqutitsisoqartillugu – piniakkat killilersukkat taakkulu qanoq atornerqarnerannut tunngasut eqqarsaatigalugit – piniarsinnaanermik allagartanik arsaarinnittoqartarnissaa Naalakkersuisut eqqarsaatigaat?

(Inatsisartuni ilaasortaq Sofia Geisler, Inuit Ataqtigiit)

Tunngavilersuut:

§37 naapertorlugu apeqquuteqaammut 321-2018 akissummi erserpoq piniarnermut aallaaniarnermullu inatsimmi aalajangersakkanik piniakkanut killilersukkanut taakkulu qanoq atornerqarnissaannut tunngasunik unioqqutitsisoqartarneranik pasilliinerit pillugit Naalakkersuisut ukiarmili ilisimasaqareersimasut.

Tupigusuutigaa ilisimasaq taanna avammut siusinnerusukkulli ilisimatitsissutaasimangimmat. Paasissutissat siusinnerusukkat pisimanginnerannut patsisissaqarluarsinnaavoq, tupigusuutiginerpaasarali tassaavoq §37 naapertorlugu apeqquut aqutigalugu paasissutissat pineqartut aatsaat avammut nalunaarutigineqarmata.

Kissaatigivara apeqquutikka ullut suliffiusut qulit qaangiutinnginneranni akineqarnissaat.